

LIGÁRADAN PÁBLO JOUN GALÁCIANA

Labúrüjan Páblo joun tílana ligílisi buri to Galáciaboun

1 ¹Anája áu Páblo, le láni Jesucrístu apóstolu. Máma güriúa anúadirubalina lun apóstolu nan, máma gíne güriúa oúnajabalina apúrichija luágu, Jesucrístu guánarügü lúma Wáguchi Búngiu le ásaaragüdübalin lídaangiñe ouweni, jagía oúnajabalina quei apóstolu. ²Au jáma sun wadújeñu lueígiñe Jesucrístu ja númabaña ya, wabúrújañoun gárada to jun, jugúya le tílana sun ligílisi to Galáciaboun. ³Binílaün Wáguchi Búngiu lúma Wabúreme Jesucrístu, ibíja jumá gíne darángilaiú jámangiñe. ⁴Rúlumuti Jesúsu libágari wawágu lun lachíbuni wafígoun, gayára lámuga wasálbarun lídaangiñe lubáfu wuríbani le lánina ubou le, queísi labúseeruni Búngiu. ⁵¡Uweírighuni lun Búngiu lun súnwandan! Ítaralá.

Ában rügüñein luwúyeri ligáburi wasálbarun

⁶¡Weíriti nanígi láu lufúresen jígiruni Búngiu le agúarubei jun lun lánigu jumá luágu le ladúgübei Crístu juágu, láu luweírín línsiñejabu! Furéseti jasáansiruni jaffñerun afálara ámu arúfudajani lún nege jadáriruni jasálbarun lídaangiñe, ⁷iyéeni arúfudajani ligía. Chúlújaña wügúriña jagánaguouñ, ja buséntiña jañáwurijani jarítangun lun jafálarun ában úma le maríchatí—ámu lueí jafíñerunrügü luágu Jesucrístu lun jasálbarun. ⁸Wel, furúmieguaügü güriúa le núbinbei adímureja jun luágu ámu luwúyeri asálbaruni lueí le arúfudaja wamáalibei jun, cáteñein lan güriúa ligía, ¡reídeilá lábugiñe líñarangun Búngiu lun sun dan, áu yebe, ában yebe ánjeli siélugiñe! ⁹Aríñaga náali meja áni naríñagayaali guetó. Ánjein núbin ában güriúa arúfudaja ámu luwúyeri ligáburi asálbaruni lídaangiñe figou jun lueí le resíbi jumáalibei, ¡reídeilá lábugiñe líñarangun Búngiu!

¹⁰Dan le naríñaguni le, ¿náluguña neréderun buídu jagíbugiñe güriúa, ódi neréderun buídu ligíbugiñe Búngiu? ¿Buséntina funági neréderun buídu jagíbugiñe güriúa? Lun jamúga ligía lan nabúseerúbei, mámaadina jamúga ában esériwiduti lun Crístu.

Ligáburi lachúlürün Páblo lun ábanbei lan láni Jesúsu apóstolu

¹¹Buséntina jasúbudiruni, nidújeñu, luágu ugánu lan le luáguti asálbaruni le uágubei nadímureja, máma jádaangiñe gürígia liábin, ¹²máma lúmagiñe ni ában gürígia nibíjei, máma gíñe larúfudajan ni ában gürígia nun, Jesucrístu guánarügü asúbudiragüdúbalin nun.

¹³Agáamba jumáli ída líña lán meja nigáburi dán meja le gúnfuligidina lúma Búngiu láu luwúyeri jagúnfulirun jurífu, subúdi jumáli ída líña lán meja lanárime neíbaajaniña tílana lilígilisin Búngiu, áfaagua áu lun nagúmuchaguagüdüniña. ¹⁴Lídan ligáburi jagúnfulirun jurífu lúma Búngiu, furésetina meja sügú jáu sarágu jádaangiñe nupáisanun ja madíseguati jagúriajoún núma, ladúga derégüdatimáatina meja lídan nagúnfulirun láu jagáburi binádu nagúbürigu. ¹⁵Ánjeinti Búngiu, anúadira láadina méja lubáragiñe nagúriajoún lun nesériwidun lun, ába lagúarun nun luágu luweírín línsiñejabu lun lánibadína lan. ¹⁶Lídan lidáani, ligía lugúndaanbei Búngiu lun lasúbudiragüdüni Liraú nun lun gayáraabei lan napúrichijani lubuídun ugánu joun ja mámabaña jurífu luágu ligía lan Wasálbaragülebei. Lárigiñe nasúbudiruni Jesucrístu, mídintina álügüdaja ni ca úma, ¹⁷mídin áu Jerusalén aríjaña ja apóstolubaña nubáragiñe, lubáragiñe líra, ába nídín furése loúbawagun Arábia. Lárigiñe, ábaya nagríbudun ubúrugun Damáscu.

¹⁸Darí úriüwa irúmu lárigiñe, ligía nídín Jerusalén, ligíati nasúbudiruni Pédro, ába neréderagun queínsi wéyu lúma. ¹⁹Maríjintina ámu jádaangiñe apóstolugu lueídügüya Jacóbo, le lamúlen Wabúreme Jesúsu. ²⁰Ninárün jáu ligíbugiñe Búngiu luágu inárüni lan le nabúrújabei jun.

²¹Lárigiñe líra, ába nídín loúbawagun Síria lúma Cilícia. ²²Ja wadújeñu lueígiñe Crístu ja tídaanbaña lilígilisin Crístu to loúbawaguboun Judéa, maríjin jamágidíná meja lídan dan ligía, ²³agáambarügütiña larínawagún. “Wügüri lé meja eíbaajabaliwa, lapúrichijañein ugánu le lánina afíñeni luágu Crístu queísi Wasálbaragüle guetó, áni ligía lé meja busénbei lagúnrinchaguni wafíñen luágu Crístu.” ²⁴Ába jíchugun uweíríguni lun Búngiu luágu lasáansiraguni nigáburi ítara.

Resíbi jamúti jíbiri apóstolugu Páblo

2 ¹Catoúrusu irúmu lárigiñe, ábaya nídín Jerusalén úara lúma Bernabé, barú numuti gíñe Títo númagua. ²Nídínbei ñi ladúga arúfuda láali lan Búngiu nun luágu lúnti lan nídín. Ñi Jerusalén, ába nadámuridagun jáma ábutigu afíñetiña, ába nabájüdaguni joun ída líña lan narúfudajan joun ja mámabaña jurífu luágu wasálbarun, nadúgünbalin líra lun gayára lan jánjarun lun le narúfudajabei, lueí leréderun le adúga náalibei lúma le nadúgübei quei ni cáta. ³Resíbi jamúti, áni ni Títo, le noúbabei, mafósurun jamúti lun lerésibirun circuncisión, láu sun máma lan jurífu. ⁴Inárüni luágu añájein lan eyéejatiña luágu idújeñu jamá lueígiñe Jesucrístu, ádaragutiña jóungua wagánaguóun

arámudaguarügü, buséntiña lun líchugúniwa gumádi luágu lúnti lan lerésibiruni Títo circuncisión ánjein busén lubeí lun láni lan Búngiu. Belútiña yéetiña jagía quei aríaaajatiña lun jarjini ída líña lan wagáburi bougudi lueí lilúrudun Moisés lídan woúndaragun lúma Jesucrístu, buséntiña jamúga lúnya wayábin lun idámunime lun lúrudu ligía. ⁵Mígiraguagüdüntiwa woúngua joun ladúga busén wamá lun ñi méme lan inárüni le lánina ugánu luáguti asálbaruni júma, jugúya le mámabei juríu, meméterunga ámu buri cátei lánwoun le lúnbei jadúgüni lun jasálbarun lueídügüya lun jaffínerun luágu Jesucrístu.

⁶Ja asúbudirúabaña queísi ábutigu—láu sun, mebérese nan láu cátañañanu lan ladúga magúseragüdünti Búngiu luágu cátei le genégerügüti—míchuguntiña ábutigu jagía ni ában iséri luwúyeri arúfudajani nun lun níchuguni jun lánwoun le napúrichijabei. ⁷Lubáragiñe líra, ábarüga jasúbudiruni luágu Búngiu lan íchugubalin wadágimanu le lánina lapúrichijoún ugánu luáguti asálbaruni joun ja mámabaña juríu nun, ítara queí buga líchuguni wadágimanu lun Pédro lun lapúrichijani ugánu méme ligía joun juríu. ⁸Aríja jamáali luágu le méme lan Búngiu le ñadágimeinbei lídaangiñe Pédro quei apóstolu jádan juríu, ligía méme lan gíñe ñadágimeinbei nídaangiñe quei apóstolu jádan ja mámabaña juríu.

⁹Queísi subúdi jamáni Jacóbo, Pédro lúma Juan, ja anügúbaña quei weírigutimaatiña, luágu Búngiu lan fuleíseibalina lun líchuguni ubáfu le nun, ába jíchuguni jájabu woun, áu lúma Bernabé, quei jánigu lídan luwádigimari Crístu, luágu gíñe gúnda jamá lun woúdin ñadágimein lídan jageíra ja mámabaña juríu, sun añája lan jagía ñadágimein lídan jageíra juríu. ¹⁰Amúriajarügütiña wáma lun warítagnun jawágu gudémetiña, áni nijánti cátei le nouchubei nadúgün láu sarágu goúnigi.

Ladeínjan Páblo lun Pédro ubúrgu Antioquía

¹¹Dan le lídinbei Pédro ubúrgu Antioquía, ába nadeínjan lun ligíbuagun, lugúndun mabuídun lan le ladúgübei. ¹²Furúmiñe meja, jóuti meja jáma afíñetiña luágu Crístu ja mámabaña juríu (ja mebéresenbaña láu circuncisión lúma buri ámu gumádi lídan lilúrudun Moisés). Ánjeinti lárigiñe jachúlürün gürígia lóunajan Jacóbo, ligía lagúmeserun Pédro adíseda jaweí ja mámabaña juríu, ába meíginjali lan jáma ladúga lanúfude lueí le gayáraabei jaríñagun ja afíñebaña luágu lúnti lan jerésibiruni wügúriña circuncisión lun jasálbarun, lun gíñe meígin jamá juríu lídan ában jáma ja mámabaña juríu. ¹³Játi jíbiri juríu ja afíñebaña luágu Crístu, ába júaradun lúma Pédro lídan cátei mabuídun le ladúgübei, ába gíñe júaradun Bernabé jáma lídan cátei ligía. ¹⁴Dan le narjínbei luágu meíbugun jamá úara lúma inárüni le larúfudajabei ugánu luáguti asálbaruni (luágu man lan asálbaruni ni cátei lúma lilúrudun Moisés), ába naríñagun lun Pédro ligíbugiñe sun adámurini. “Amúrü le juríu, berédera abágarida quei ja mámabaña juríu, mabágariduntibu quei juríu. ¿ída líñáti babúseerúnbei bafósuruniña ja mámabaña juríu lun jabágaridun quei juríu?”

**Sálbawatiña juríu, queísigubeirügü sun gürigia,
luágurügü jafiñen luágu Jesucrístu**

¹⁵Ába nasígirun aríñaga joun.

—Juríu wagía lúmagiñe wagúriajóun, aríñagatiwa luágu mafígoun wamá, luágu mítaran wamá quei ja mámabaña juríu ja agúriajóubaña boúgudi lueí lilúrudun Búngiu. ¹⁶Láu sun líra, subúdi wamúti luágu úabei lan ni ában eréderuti richágu ligíbugiñe Búngiu luágu ladúgüni le lubeíbei lilúrudun Moisés, láurügübei lafiñerun luágu Jesucrístu lerédera richágu ligíbugiñe Búngiu. Ligía gíñe lébubei wafiñerun luágu Jesucrístu, wagía le juríubei, lun gayáraabei lan weréderun richágu ligíbugiñe Búngiu lídaangiñe afiñeni le, máma lídaangiñe wadúgüni le lubeíbei lilúrudun Moisés, lugúndun úabei ni ában eréderuti richágu ligíbugiñe Búngiu lueígiñe ladúgüni le lubeíbei lilúrudun Moisés.

¹⁷Ítara líña lubeíti, quei wáluajan weréderun richágu ligíbugiñe Búngiu lídaangiñerügü Jesucrístu, ába waríjin luágu gafígoun méme wamá queísi ja mámabaña juríu ladúga wabágariduña lan gíñe guetó boúgudi lueí lilúrudun Moisés, ¿gayáraati waríñagun lueígiñe líra luágu Crístu lan gafígoungüdúwaliwa? ¡Ni cátei líbe líra! ¹⁸Lubáragiñe líra, lun jamúga wagíribudun lun weménigidun luágu wagúnfulirun lúma lilúrudun Moisés lun wasálbarun lárigiñe weménigidun luágurügü wafiñerun luágu Crístu, warúfuduñein luágu magúnfulirun wamá lúma linárün laníchigu lúrudu ligía, áni gafígountiwa. ¹⁹Áu, queígubeirügü jiláadina lan lun lilúrudun Moisés, lúrudu méme ligía ouwedagüdübadina lun, lun gayára lan nabágaridun lun Búngiu. ²⁰Rúguatina núngua quei jiláadina lun figoú, dáwaguañu luágu gurúwa lúma Crístu. Mámaadina lubeíti áu méme abágaridubei nídaangua, Crístu abágaridubei nídan. Ibágari le nabágaridubei lídan nógubu, nabágariduñein láu sun nafiñen luágu Liraú Búngiu le jínsiñejabúbei nun, ába ledéregeragun lúngua lun loúnwen nuágu. ²¹Mabúseerúntina lubeí namájarun lun lareíni Búngiu láu nagíribudun lún buri igáburi lánina lilúrudun Moisés, lugúndun lun jamúga gayára lan leréderun gürigia richágu ligíbugiñe Búngiu láu lagúnfulirun lúma lúrudu ligía, úati jamúga ju lan loúnwen Crístu.

Lúrudu ódi afiñeni

3 ¹¡Jugúya Galáciana, magáambaditün gíñe! ¿Ca abíñaragubadün lun magáambun jubeí lan ugánu le inárünibeí libúgürü wasálbarun? Lídan meja wapúrichijan jun, arúfuda wamúti laníchigu loúnwen Crístu luágu lugúruwan jun, furáangu. ²Aríñaga jumeí cátei le nun. ¿Lueígiñe jagúnfulirun lúma lilúrudun Moisés jerésibirei Sífiri Sándu ódi lueígiñe jafiñerun luágu le jagáambubei luágu Crístu? ³¿Ída líña ítara lubeí jumágaambadi? Gumésetün eíbuga lúma Crístu láu lubáfu Sífiri Sándu, ¿guetó jarítaguatün funági luágu buítimaabei lan jeíbugun lun jígiruni

Sífiri Sándu lun jagúnfulirun lúma jagáburi juríu? ⁴¿Marúfudajaangili sun le jasúfurirubei jun? ¿Arúfudajaali lámuga jun! ⁵Dan le líchuguni Búngiu láni Espíritu jun, adúga ligía miláguru jagánagua, ¿cásan uágu ladúgei líra? Máma lugúndun adúga jumáni le lubeíbei lilúrudun Moisés ladúgei, ladúgünbalin lugúndun afíñe jumá luágu le jagáambubei luágu Liraú.

⁶Jarítagua jumá luágu Abrahám. Rúlumuti meja sun laffíñen luágu Búngiu, luágu laffíñen, ába lerésibiruni Búngiu queísi ában wügúri richáguati. ⁷Ligía lubeíti jugúya, lúnti jasúbudiruni luágu ja lan afíñebaña, jagía lan linébaanfaanbaña Abrahám tímatimaatiña. ⁸Queísi subúdi láni Búngiu lubáramegiwa luágu níbaña lan jádaangiñe ja mámabaña juríu lun jayábiba lan lun jeréderun richágu ligíbugiñe láu jafíñerun luágu Jesucrístu, ába laríñaguni ugánu buíti lun Abrahám lubáramegiwa, queísi bürúwañu lan tídan lilíburun. “Jabínirúaba sun gürígia ubouágu bídaangiñe.” ⁹Ítara líña lubeíti, ja afíñebaña, biníwatiña úara lúma Abrahám le afíñerubei luágu Búngiu.

¹⁰Ja afíñerubaña luágu jasálbaruba lan láu jagúnfulirun lúma lilúrudun Moisés, bulíeiguatiña, lábugiñeñanu líñaragun Búngiu, lugúndun taríñajare Lerérun Búngiu. “Sun ja magúnfulirunbalin sun le bürúwañubei tídan lilíburun nilúrudun le níchugubei lídaangiñe Moisés, lábugiñeñanu níñaragun.” ¹¹Furáanguti lubeíti luágu úa lan ni ában eréderuti richágu ligíbugiñe Búngiu luágu ladúgüni le laríñagubei lilúrudun Moisés, lugúndun taríñajare Lerérun Búngiu. “Láu laffíñerun gürígia luágu Búngiu lerédera richágu ligíbugiñe, ibíjaleíme ibágari magúmuchaditi.” ¹²Ánjein lilúrudun Moisés máma cátei lánina afíñeni, lánina cátei le adügúwarügüti ladúga laríñajare lúrudu ligía. “Láu rügúñein jamúga lagúnfulirun gürígia láu sun igáburi lánina lúrudu le, libíjei ibágari magúmuchaditi.”

¹³Wagía queísi gürígia garaúwarügütiña, mabáfutiwa lun wagúnfuliruni sun lúrudu ligía. Ába laséfuruníwa Crístu lídaangiñe líñaragun Búngiu lé lúnbei yebe láburujan wawágun lueígiñe magúnfulirun wamáni sun lilúrudun Búngiu le líchugubei woun lídaangiñe Moisés. Barú lumuti Crístu líñaragun Búngiu luoúgua wewéñagua lídan le loúnwenbei luágu gurúwa, lugúndun taríñajare Lerérun Búngiu. “Íñarawagúati sun le ádarawagúti luágu gurúwa.” ¹⁴Adúga lumúti loúnwen Crístu lun liábinba lan abíniruni le uágubei laríñaga Búngiu lun Abrahám, lídaangiñe Jesucrístu joun gíñe ja mámabaña juríu, lúma lun werésibiruni, sun wagía, Sífiri Sándu le uágubei laríñaga Búngiu, láu waffíñen.

Lilúrudun Moisés, lúma lerérun Búngiu lun Abrahám

¹⁵Nidújeñu, níchiga ában jémpulu jun lídaangiñeti jabágari gürígia. Dan le ladúgün wügúri ában darádu, ába laseíniruni, úati ni ában lun gayára lan lagúluuduni ni lun líchugun ni cátei lánwoun. ¹⁶Ítara líña gíñe, rúlumuti meja Búngiu lerérun lun Abrahám lúma lun linébaanfan. Maríñaguntu Lerérun

Búngiu “binébaanfaangu”, camá jamuga jawáguti sarágu güirigia, taríñajare “lun binébaanfan”. Laníchigu líra, “ábanrügü güirigia”, le Crístu. ¹⁷Niján le naríñagubei. Adúgati Búngiu ában darádu lúma Abrahám, ába lachóururuni, gádürü-san darándi irúmu lárigiñe, ába líchuguni lilúrudun lun Moisés lun lafúnraanguagüdüni joun güirigia. Ligía darádu lubeí lé meja ladügübei Búngiu lúma Abrahám siñáti lagúludúniwa láu ában lúrudu le ñúbinbei gádürü-san darándi irúmu lárigiñe, lun lígiruni lerérun Búngiu lun Abrahám mebégiga. ¹⁸Lun jamúga lídaangiñeti lan agúnfuliruni lúma lilúrudun Moisés cátei le líchugubei Búngiu, mámaali jamúga ában cátei le líchugubei lun lagúnfulirún láu lerérun. Ánjeinti le laríñagubei Búngiu lun Abrahám, luágu líchugubei lan lun, míni lan líra, libíjibeí cátei ligía madügünga ni cátei lun lagáñeiruni.

¹⁹¿Cáti un ju lan lilúrudun Moisés ánjein siñá lubei lasálbaruniwa? Ñúbinti lúrudu ligía sarágu irúmu lárigiñe lidáradun Búngiu lúma Abrahám lun larúfuduni jafígoun güirigia joun, lúntirügü ladúrarun darí liábin linébaanfan Abrahám, le Crístu, le gíñe úmabei ladügüwa darádu ligía. Rúlumuti Búngiu lilúrudun joun ánjeligu lun jíchuguni lun Moisés, liábin Moisés, ába lafúnraanguagüdüni lúrudu ligía joun güirigia. ²⁰Ánjeinti dán meja le ladügübalin Búngiu lidáradun lúma Abrahám lun labíniruniña sun güirigia lídan, mayúsurunti ánjeligu, mayúsurun ligía güirigia, ligía adügübalin sun cátei.

Ca lan uágu níjein lubeí lilúrudun Moisés

²¹¿Laríñaguña funági le luágu múaradun lan lerérun Búngiu lúma lilúrudun le líchugubei lídaangiñe Moisés? Máma líña. Lun jamúga rúa lan ában lúrudu le líchugubei ubáfu woun lun wagúnfulirun láu, gayáraati jamúga jayábin güirigia lun jeréderun richágu ligíbugiñe Búngiu láu jagúnfuliruni le lubeíbei lúrudu ligía. ²²Lídan linárün cátei, mabáfutiwa lun wagúnfulirun lúma lilúrudun Búngiu, le líchugubei lídaangiñe Moisés, queísi laríñagun Búngiu tídan Lerérun. “Sun güirigia lábugiñeñanu lubáfu figoú.” Ítara líña lun lídaangiñerügü lan afíñeni luágu Jesucrístu gayára lan jáfuridun güirigia lábugiñeñe lubáfu figoú lun jeréderun richágu ligíbugiñe Búngiu láu jafíñen luágu Jesucrístu, queísi meja laríñagun Búngiu lun Abrahám.

²³Lubáragiñebei liábin Crístu lun gayáraabei lan wafíñerun luágu lun wasálbarun, lábugiñeñadiwa buga lubáfu lúrudu agúrabaja liábin. ²⁴Ába lubeíti lanúgüniwa lilúrudun Moisés lánime camá jamuga irájüñü wagía lun latoúnigiruniwa lueí wuríbani darí liábin Crístu lun dánme lan wafíñerun luágu, gayáraajalíme weréderun richágu ligíbugiñe Búngiu. ²⁵Guetóti, quei chúlújali lubeí Crístu, mámaadiwa lábugiñe loúnigirun lilúrudun Moisés.

²⁶Guetóti lirájüñü Búngiu sun jugúya luágu jafíñen luágu Crístu, lídaañadün ában lúma. ²⁷Sun jugúya le belújalibeí lídoun ában lúma Crístu láu jabásterun, ibíjaadün ában igáburi líbe ligáburi Crístu. ²⁸Mámaali cátei lánina lun jurú jumá o máma jumá jurú, o idámuni

o máma idámuni, wügüri o würi, ladúga láu lídaañadün lan ában lúma Crístu Jesúsu, sun jugúya ábanrügüñadün. ²⁹Ánhein lánigu jubeí Crístu, linébaanfaangu Abrahám jugúya, jerésibirubei le uágubei laríñaga Búngiu lun Abrahám queí jalágaante.

4 ¹Niján cátei le nabúseerúbei naríñagun. Dan le loúnwen ában úguchili áni nüratigili liraú le lúnbei lerésibiruni alágan, mabuíduintimaati dan lun irájüi ligía sügü jáu lumúsuniña lúguchi, láu sun ligía lan labúremebei alágan, ladúga sinágili lan layúsuruni. ²Añáhein güirigia oúnigiruti, aríja jagía láu lalágaante darí lachülürün dan le líridubei lúguchi lun lerésibiruni. ³Ítara líña lasúseredun wáma. Lubáragiñebei liábin Crístu uboúagun, lábugiñeñadiwa meja kúruđu kúma buri igáburi le mámabei lúnti ladúrurun lun sun dan. ⁴Dan le lagúnfulirunbei dan, ába loúnajani Búngiu Liraú, le agúriajoubei tídaangiñe ában würi, ába liábin quei juríu lábugiñe lilúrudun Moisés. ⁵Liábinbei ítara lun laságaruníwa lábugiñeñe kúruđu ligía, lun lerésibiruníwa Búngiu queísi lirájüñü.

⁶Lúnti larúfuduni Búngiu luágu lirájüñüjadíwa lan, ába loúnajani lání Liraú Espíritu, le méme Sífiri Sándu, tídoun wanígi, áni agúajati Espíritu ligía wádaangiñe lun Búngiu. “¡Núguchi!” ⁷Lirájüñü lubeíti Búngiu wagía, mámaadiwa idámuni, áni ladúga lirájüñü wamá Búngiu, líchugubei alágan woun lídaangiñe Crístu.

Labúseeruni Páblo le buídubei joun ja afiñebaña

⁸Dán meja le ibídiñegili Búngiu jun, jadámuñadün meja “búngiugu” ja mámabaña búngiugu lídan linárün cátei. ⁹Ánhein guetó, láu subúdi jumáli lan Búngiu, —lídan lirícha cátei, láu subúdi láadün lan Búngiu —¿ída lubáyan gayára lan jarítangun lúnya jíchaagun júngua queísi idámuni lábugiñoun kúruđu kúma buri igáburi le mabáfubei lun ladúgün ni cáta jun? ¹⁰Adáaguatün buri féđu ítaga wéyu, ítaga játi, ítaga dan, ítaga írúmu queísi laríñaguni lilúrudun Moisés lun jeréderun richágu ligíbugiñe Búngiu, lídan jarítangun. ¹¹Janúfudetina lueí masériwidun lan wadágimanu le nadúgübei jagánagua lun ni cáta.

¹²Nidújeñu, ayúmuraguatina jun lun jarítangun queísi áu luágu buri cátei le, ladúga furíjadina lun mámaadina lan lábugiñe lilúrudun Moisés queísi meja mámañadün lan lábugiñe kúruđu ligía. Madúgüntün ni ában wuríbani nun lídan meja júma nan, ¹³quei subúdi jumáni, ladúga meja ában sándi le nuágubei gayára lubeí neréderun júma furúmiñeti dan lun napúrichijani ugánu lánina asálbaruni jun. ¹⁴Sándi ligía lé meja nuágubei, ában meja ouchúni nun, múnabunti janúgünina luágu líra. Lubáragiñe líra, ába jerésibirunina queísi ában lání Búngiu ánjeli, camá jamuga Jesucrístu guánarügü áu. ¹⁵¿Ca susérebei lun ugúndani lé meja jasándirubei náu? Gayáraati naríñagun luágu jáni fuleísei luágu ánhein lan jamúga meja lúnti, jaságaruñein lan jamúga jágu lun jíchuguni nun. ¹⁶Guetó, ¿jáganijadina funági lueígiñerügü naríñaguni inárüni jun?

¹⁷Weíríti juwámaan joun mútu ja, mabuídunti jarítangun jubá. Le jabúseerubei, lun jadísedagüdünün waweí lun ában lánme jawámaadun jun. ¹⁸Buíti lun juwámadirun joun ámu, ñi áu yebe júma o úaadina lan júma, ánjein láu lubeí lubuídun arítangun ladügúwa. ¹⁹Nirájüñü, nasúfuriruñaya igárigu juágu quei ában úguchuru dan le tagáridun, áni ítara méme núba asúfurira daríme lun jaráfuduni luágu njein lan Crístu jídan. ²⁰¡Buséntina jamúga lun anájein lan júma guetó lun gayára lan nadímurejan jun láu ámu luwúyeri, ibídiñeti nun cába lan narítagua juágu!

Jémpulu tuáguti Agár túma Sára

²¹Jugúya le busénbei jíchaagun júngua lábugiñoun lilúrudun Moisés, aríñaga jumeí cátei le nun. ¿magáambun jumágili le laríñagubei lilúrudun Moisés? ²²Laríñajare luágu garájüñü lán meja Abrahám bián irájüñü, ában táu lidámun, le ában táu lúmari to ában wúri to máma idámuni. ²³Le tiraú idámuni, ítara líña lagúriajoún quei jagúriajoún sun irájüñü, ánjein le tiraú to máma idámuni, lagúriajoún lun lagúnfuliruba lan le uágubei laríñaga Búngiu lun Abrahám. ²⁴Ítara líña cátei le queísi ában jémpulu. Bián wúriña ja, ítara jáña queísi bián darádu le ladügubei Búngiu. Adúgati ában darádu lúma Moisés dan le líchugunbalin lilúrudun lun luágu wúbü Sinaí. Darádu ligía, ítara líña queísi Agár ladúga sun lan gúrigia ja lábugiñebaña lúru lu ligía idámuni lun jagúnfulirun lúma, queísi idámuni jamá sun tirájüñü Agár. ²⁵Wúbü le Sinaí lídaañein fulásu le gríbei Arábía (le ñi lubei jagánoua ladúgawagun tiraú Agár). Agár liyáwaboun wúbü ligía lúma lúru le íchugubei ñi. Ubúru gu le Jerusalén le guetóbei, ítara líña quei wúbü Sinaí lídan dan le sügújalibei, ladúga ubúru gu ligía jáu sun lílana, ítara jáña quei idámuni lun igáburi lánina lilúrudun Moisés. ²⁶Ánjeinti Jerusalén le siélubei, máma lánina idámuni queísi máma lan idámuni lúmari Abrahám, áni lirájüñü Jerusalén le siélubei wagía. ²⁷Taríñajare Lerérun Búngiu.

Gúndaaguabá, wúri maraújeitu, amúru to maraúboun, wáguabá láu ugúndani, amúru to ibídiñebeí agáriduni bun, lugúndun amúru to áuboun mebéresenwa lan, gíbetimaabaña birájüñü sügú táu wúri to garaúboun láu búmari.

²⁸Nidújeñu, queísigubeirügü Isáac lan irájü le líchugubei Búngiu lun Abrahám lun lagúnfulirun láu lerérun lun, wagía afíñetiña ladúgawagunbaña Abrahám ja uágubaña laríñaga Búngiu lun. ²⁹Ítara queí meja dan ligía, isáani le agúriajoúbei lídan ában igáburi quei furúmieguaügü agúriajoúni eíbaaja lumúti meja isáani le agúriajoúbei láu lubáfu Sífiri Sándu, ítara líña gíñe lasúseredun guetó—ja lábugiñebaña lilúrudun Moisés eíbaaja jamútiña ja mámabaña lábugiñe lúru lu ligía. ³⁰¿Cáteisán taríñagunbei Lerérun Búngiu? Taríñajare. “Bugáboun idámuni láu sun tiraú, lugúndun siñáti gafánran lan tiraú idámuni lídan alágan

lúma tiraí to mámaboun idámuni.” ³¹Nidújeñu, mítaraantiwa lubeíti quei tirájüñü idámuni, ítara wáña quei tirájüñü wúri to mámaboun idámuni.

Míchaaguaya jumá júngua idámunime

5 ¹Furígüda láadiwa Crístu lídaangiñe idámuni wamá lun lúrudu buri lúma igáburigu. Reídei jumá lubeíti le ñí lubei líchugaün Crístu, míchaaguaya jumá júngua idámunime.

²Agáamba jumána. Áu páblo aríñagatina jun luágu ánjaün lan íchaagua júngua lábugiñoún igáburi le lánina circuncisión lún nege jeréderun richágu ligíbugiñe Búngiu, mesériwidunbei Crístu lun ni cáta jun. ³Naríñagayaali lun furúmieguaügü wügüri le resíbinbalin circuncisión luágu lúnti lan ladügüni sun líbiri le lubeíbei lilúrudun Moisés lun gayáraabei lan leréderun richágu ligíbugiñe Búngiu. ⁴Jugúya le jarítaguabei luágu richágua jumá ligíbugiñe Búngiu láu jagúnfulirun lúma lilúrudun Moisés, ígira jumáli Crístu, díseedün lueí asálbaruni le láurügüti lareíni Búngiu. ⁵Wagía, láu lubáfu Sífiri Sándu lúma láu wafíñen luágu Jesucrístu, jeménigitiwa luágu weréderuba lan richágu ligíbugiñe Búngiu. ⁶Ánjein lídaañadiwa lubeí ában lúma Crístu Jesús, málati werésibiruni circuncisión lúmoun merésibirun wamáni. Le busénwabei, lun afíñe wamá luágu Jesucrístu lúma lun warúfuduni afíñeni le wawágubei láu wínsiñejabu joun gürígia wáledi.

⁷Buíti meja jeíbugun lúma Crístu, ¿ca ígiragüdübalin lagaambúniwa inárüni jun? ⁸Máma Búngiu le agúarubei jun adügübalin líra. ⁹Mabúlieida jumeí luágu furése lan lawáraüdagun arúfudajani le maríchatí lun lagúnrinchaguni jafíñen sarágu gürígia queísigubeirügü résigüda lánun murúsun ísi sun to añóundawaguboun láu. ¹⁰Neménigiduña luágu Wabúreme Crístu lúnya lasáminaragüdünün queísi áu luágu buri cátei le. Áni cáteiñein lan gürígia le añáwurijabei jun, labeíchubei Búngiu.

¹¹Aríñagatiña arúfudajatiña yéetiña jagía luágu apúrichija nan luágu lúnti lan jerésibirun wügüriña circuncisión lun jasálbarun. Nidújeñu, ánjein jamúga apúrichija nubálin cátei líra, ¿cámesan jeíbaajana meme jurú? Lun jamúga napúrichijani circuncisión, maríbaanti jamúga láburujan dimúrei luáguti loúnwen Crístu luágu gurúwa joun. ¹²Ánjeinti jawágu ja abúseerúbaña jádaruni jídoun luágu lúnti lan jerésibiruni circuncisión, ígúndaatina jamúga lun jíbugunun jawáriuwa gumúgubei!

¹³Ánjeinti jugúya, nidújeñu, agúajati Búngiu jun lun lagídarunün lábugiñegiñe igáburi lánina lilúrudun Moisés, manúga jumeírügi líñáti líra lun lébume gayára lan jasígiruni ugúndani buri le lánina ubou le. Lubáragiñe líra, seríwigua jumá júniwagua láu ínsiñejabuni le jídaanbei jubáruagua, ¹⁴lugúndun láu jagúnfulirun lúma lúrudu le aríñagubei. “Jínsiñelá gürígia bíledi bun queísi bísiñegua búngua”, gúnfulijadün láu sun lilúrudun Moisés. ¹⁵Goúnigi jumá, ánjaün ageíndagua júmagua, jagúmchaguagüdüba júniwagua.

Ugúndani le lánina uboú, lúma eíbuguni lúma Sífiri Sándu

¹⁶Niján cátei le naríñagubei jun. Abágarida jumá quei labúseeruni Sífiri Sándu, ítara lúba mafála jumáni jugúndan guánarügü le lánina uboú.

¹⁷Ugúndani le lánina uboú máma lúmagiñeñein Sífiri Sándu, áni Sífiri Sándu, máma lúmagiñeñein ugúndani le lánina uboú. Gáganiguati ában lúma le ában, ligía lásiñerunbei jadúgüni jugúya cátei le jabúseerúbei yebe jadúgün. ¹⁸Ánjein Sífiri Sándu lubeí abúgurubadün, mámaadün gíñe lábugiñe lilúrudun Moisés.

¹⁹Ménreengúnti larijíniwa cátei lán buri cátei le jadúgübei ja afálarubalin ugúndani lánina uboú. Gámariguatiña jámagua mamáriedunga, adáaguatiña buri cátei wíyeti, úati nibúsigari jamá láu jasálufurin, ²⁰judúguatiña joun sándu, abíñaraja jagía. Níjein iyéreejabuni jádan, gáganiguai, lúma eméendüni. Ménreengúnti jagáñidun, jawoúgua rügüñein jarítagua súnwandan, fánreinguagüda jamúti adámurini.

²¹Gimúgatiña, gáfarajadi, gátadi, weínamu jeígin, adúga jagía ámu buri cátei lenége líra. Naríñaguñein jun quei naríñaguni lubáramegiwa luágu ja lan adúgübalin cátei le, mebélurunbaña lídoun larúeijan Búngiu.

²²Niján buri igáburi le líchugubei Sífiri Sándu. ínsiñejabuni, ugúndani, darángilaü, gagúraasuni, areíduni, lubuídun igáburi, úaraguni,

²³manáanguni únguaü, ragúguaü únguaü. Úaraguati buri igáburi le lúma furúmieguaü rügü lírudu. ²⁴Ja lánigubaña Crístu, dágua jamáli sun luwámaan cátei le lánina uboú le joun luágu lugúruwan Crístu.

²⁵Ítara quei wabágaridun lídaangiñe Sífiri Sándu, lúnti gíñe wígirun lun labúguruníwa Sífiri Sándu lídan le wadúgübei.

²⁶Moún lumuti wanáangun woúngua, añáwurijatiwa joun wíbirigu ítara, rúti gíñe gimúgaü wádaangua.

Íderagua jumá júmawagua

6 ¹Nidújeñu, ánjaün aríja luágu áburujaali lan ában jídaangiñe lídoun figoú, jugúya le eíbugubei lúma Sífiri Sándu lúnti jíderaguni lun lagídarun lídaangiñe figoú ligía, adúga jumeí láu maweíriguni. Lúnti gíñe goúnigigua jumá júngua lueí gíñe jáburujan lídoun figoú queísi ligía. ²Íderagua jumá júmawagua lun jawánduni jijúrügu, ítara lúba jagúnfulirun lúma lilúrudun Crístu, le lánina ínsiñejabuni.

³Lúnti wíderaguniña wíbirigu lugúndun ánjein anáangua gürígia lúngua áni ni cáta ligía, leyéedaguña lúngua. ⁴Cáda ában gürígia lúnti lagúserun lúmagua ída líña lan ladíñurun. Ánjeinti adáriragua lúngua buíduñu, ligíaba buídu guánarü lúngua, máma ámu, ⁵lugúndun sun gürígia geféenbaña lun Búngiu jawoúgua, máma jawágu ámu.

⁶Le únbei larúfudajoúa Lerérun Búngiu lúnti lafánreinjani sun luwúyeri ibíjini lúma le arúfudajabei lun.

⁷Mayéedagua jumá júngua, siñáti jéjerajan láu Búngiu. Le lábunagubei gürígia, ligíaba gíñe lalúbaja. ⁸Ánjein ábunagua ában gürígia cátei le íchugubei ugúndani le lánina uboú lun, le méme lábunagubei, líchuguba ában alúbajani le lánina féridi lun. Ánjein ábunagua ában gürígia cátei le íchugubei ugúndani lun Sífiri Sándu, líchuguba Sífiri Sándu ában alúbajani le lánina ibágari magúmuchaditi lun. ⁹Moún lumuti lubeíti labúchadun wawágu adúgei cátei le buídubei, lugúndun ánjawa ítara méme adúgei, walúbajaba buíti dánme le lachúlürün dan lun werésibiruni. ¹⁰Ligía, adúga wamei lubei le buídubei joun súngubei ságü gayára lan, joúntima wadújeñu lueígiñe Crístu.

Ewéridijani lúma lagúmujoún ayoúraguni

¹¹Aríja jumá luweínamu létera le áubei nabúrúja jun guetó láu nújabu guánarügü. ¹²Ja abúseerúbaña jafósurunün lun jíchaagun júngua lábugiñoun igáburi le lánina circuncisión jadúgüñein lúnügü jeréderun buídu jagíbugiñe juríu, lun meíbaajoúniwa jamá lueígiñe jamúga jaríñagun luágu lídaangiñe rügüñein lan loúnwen Crístu wasálbara. ¹³Ni ja íchaagubaña joúngua lábugiñoun igáburi le lánina circuncisión, madúgün jamúti sun le laríñagubei lilúrudun Moisés, busénrügüitiña lun jerésibiruni jugúya circuncisión lun gayára lan japántajan luágu jafósurunün lun jibíjini circuncisión. ¹⁴Ánjeinti áu, mabúseerúntina napántajan ni ca uágu, ában rügüñein cátei uáguti nadímureja weíri—luágu loúnwen Wabúreme Jesucrístu luágu lugúruwan wawágu. ¡Lídaangiñe lugúruwan Crístu jiláañu líña cátei le lánina uboú nun áni jiláañu níña gíñe lun cátei le lánina uboú! ¹⁵Lun Búngiu, ni cáta ánjein ibíja wabálin circuncisión lúmoun mibíjin wamáni, le busénwabei, lun iséri wamá gürígia. ¹⁶Sun ja abágaridubaña ítara, jagía lánigubaña Búngiu le tímatimaati, resíbi jamá lubeíti darángilaü lúma gudémejabu lúmagiñe.

¹⁷Lúmagiñe dan le ugúñe, mabúseerúntina lun nibíjin lénreengúnga ni ca úmagiñe. Arúfuda lumúti lárigi buri bíti le nuágubei luágu ában nan esériwiduti lun Nabúreme Jesús.

¹⁸Nidújeñu, binílaün Wabúreme Jesucrístu, sun jugúya. Ítaralá.